

Xlīmactutu xcarta tū tzoklī San Juan

XATAPAJMUJUN TACHIHUIN:

Yumá c-xcarta San Juan nā līmapacuhuicán “kolutzín”, chū huá tzokniy chātum cānajlani huantī huanicán Gayo; lītākalhchihuínán xtalipuhuán caj xpalacata nītlán xtapuhuán chātum lītum huantī huanicán Diótfrefes. Yumá Diótfrefes xlakaya xtascújut xlīmasíyut xtachihuín Dios, huāmpī masqui chuná, xlá nī pala tzinú xmasiyunikoy xtapáxquit c-xlalatincan amakapitzín chuná lantla xlīmasíyut chātum cānajlani Cristo. Huāmpī huata lipaxuhuay xlatamat tanuj lītum chixcú huantī huanicán Demetrio sampī luhua tlan lantla lichihuínankoy huantī lipahuankoy Dios.

Juan lipaxuhu xakatlīlacán Gayo

¹Quit yamā kolutzín Juan huantī Dios quilacsacnīt naclīscuja; luhua cāna lipaxuhu ctzoknimán yumá quincarta huix talipahu quiamigo huantī luhua xlicāna cpaxquiyán.

²Koxutá huix quintāla Gayo, quit csequiniy lītlan Dios pī xtachuná lantla kalhiya lipaxuhu latámat c-milīstacna, pus nā chuná cakahī tlan latámat c-mintiyatlīhua, chū nītú catzankanín, xahuá nītú cachipán tajátat. ³Quit luhua cpaxúhualh acxnī quilakochī makapitzín natalanín sampī xlacán quilītākalhchihuínankolh pī huix chunatiyá lantla akstītum lipahuana Quimpuchinacán, chū līlāpat xtalulótkat. ⁴Quit tances ccahuaniyán pī atzinú ckalhiy tlanca tapaxuhuán acxnī ccatzīy pī huantī clīmacankoy quilakskatán akstītum līlamakó c-xlatamatcán xtaluloktat Dios.

⁵Quintāla Gayo, quit cpaxuhuay caj huantu mimpalacata sampī luhua quihuanikonīt lantla akstītum

līscujpakó, chū maktayakoya xlipacs huantī lipahuankoy Cristo, xalīhuacá maktayakoya yamā huantī alacatanu xalanín huantī lakminkoyán. ⁶Xlacán minkoy unū c-quincachiquincán acxnī macxtum cuilahu, maklhuuatá lichihuínankoy lantla lakalhamankoya, chū paxquikoya. Huāmpī cumu chū makapitzín lenimakochán quincarta quit cuaniyán pī lipaxuhu calīmaktayakó huantu namaclacasquinkoy c-tijī laquimpī nītú natzankanikoy chuná lantla lakatiy Dios nalāmaktayayahu. ⁷Cumu xlacán aya tzucunittá lītalakchokokoy laquimpī naliakchihuínankoy huantu Jesucristo quincalīmapaksinītán, pus canīhuá masqui mákat quīchamakó, chū nī lacasquinkoy namaktayakoy yamá huantī nī lipahuankoy Dios. ⁸Pus huá xpalacata calīhuaniyán pī quin luhua quincaminīniyán namaktayalenkoyahu canīcahuá antānī xlacán naankoy

liakchihuinanankoy xtachihuín, chu xtaluloktat Dios.

**Luhua xlicana nitlán
xtalacapastacni Diótfrefes**

⁹Quit ctítzoklí mactum quincarta huantu ctimalakachanikolh yamá huanti lakataquilhputakoy Dios, chu maxtum lilakoy c-mincachiquincán, huampi huata Diótfrefes ni matlánilh huantu quin xaclimapaksimakohu, huá chuná litláhualh sampi xlá na luhua xapuxcu litaxtuputún, chu ni lacasquín atanu nahuaníy huantu xlitláhuat. ¹⁰Huá xpalacata lacatanes ccalihuaniyán pi acxni quit nacanachá, naclihuaniy, chu nacakastacyahuay sampi catuhuá quilhuanthluán huantu ni xlicana quincaliaksanin antlahuanán. Chu ni caj xman huá huantu huan, caj tlahuay, hasta ni pala tzinú makamakhltinamputunkoy yamá natalánin huanti mákat minkoyachá, chu makapitzín huanti makamakhltinamputunkoy c-xchiccán, xlá lihuaniy pi nialh camakamakhltinankolh, hasta tlakaxtukoy huanti kalhakaxmatmakankoy huantu xlá huan. Huá xpalacata climaluloka pi lixcájnít xtalacapastacni.

Luhua tlan xtalacapastacni Demetrio

¹¹Talá, huá xpalacata quit clihuaniyán, huix ni chuná catlahua

huantu lixcájnít, huata caj xman calíscujti huantu tlan. Sampi xlipacs huanti tlahuay huantu lacuan tatlahu, pus tamá huá tapaksiniy Dios, huampi huanti huatiyá tlahuama huantu nitlán, chu huantu lixcájnít, xlicana pi tamá chixcú ni alakapasa Dios ni pala akataksnit xtalacapastacni.

¹²Huampi ni chuná licatziy Demetrio, sampi xlipacs huanti lipahuankoy Dios, pacs chuná huankoy, chu ni lay tí naliaksán tu nitlán sampi xlicana xlá pi kalhiy tlan xtalacapastacni, chu akstítum lama. Na chuná quin lipaxuhu clihuinananahu huantu xlá tlahuama lacuan tatlahu, chu huixín catziyátit pi xlipacs huantu cquilhuamahu huá xtalulóktat.

Juan huaniy hasta chalí

¹³Luhua tu ctihuaniputunán, huampi ni luhua chuná cpuhuán caj nactzoknaniyán, ¹⁴sampi cpuhuán pi ni pala makas quilhtamacú naclakanachán laquimpí man lacatzaj nactachihuinanán.

¹⁵Quit clacasquín pi Dios camaxquín huantu lipaxuhu, chu aktziyaj latámat. Xlipacs miamigos luhua cana lipaxuhu xakatli lacamakočan. Luhua catlahuapi tlanca litlán, xlipacs lantla chatunu quiamigojcán lipaxuhu camacatiyakopi huantu quimpalacata.